

西域圖志



西域圖志



欽定皇輿西域圖志卷之十八目錄

疆域十一

天山南路五

葉爾羌屬

葉爾羌

察特西林

巴爾楚克

呼拉瑪

伯什恰特

拜林

密什雅爾

塔噶爾齊

阿布普爾

汗阿里克

庫勒塔里木

鄂湍楚魯克

雅哈阿里克

坡斯恰木

舒帖

呼木什恰特

伯什阿里克

托古斯恰特

鄂爾多諤斯騰

阿喇勒

喀瑪喇克

哈喇古哲什

喇巴特齊

和什阿喇布

色勒克郭勒

伊奇蘇寧阿喇斯

裕勒阿里克

庫克雅爾

塔克布伊

英額齊盤

沙圖

哈爾噶里克

貝拉

楚魯克

皮什南

固滿

木濟

章固雅

薩納珠

衮得里克

都窪

皮雅勒阿勒瑪

阿克阿克

塞爾勒克

喀爾楚



欽定皇輿西域圖志卷之十八

疆域十一

天山南路五。

葉爾羌屬。東至察特西林。接阿克蘇界。西至喀爾楚入蔥嶺。通藩屬拔達克山界。東南至皮雅勒阿勒瑪。接和闐界。西北至喀什噶爾達里雅。接喀什噶爾界。

葉爾羌。

葉爾羌。舊對音葉爾奇木。或曰葉爾欽。皆音之。

轉也。東道由阿克蘇八百里。西道由喀什噶爾  
五百里至其地。距京師一萬二千三百八十五  
里。城周十餘里。有六門。土岡環其東南。城居岡  
上。規模宏敞。甲於回部。城中街巷。屈曲錯雜。無  
有條理。民居以土垣屏蔽。穴垣爲戶。高者三尺。  
傴僂出入。屋宇毗連處。咸有水坑。導城南哈喇  
烏蘇之水。達於城北。是資飲用。遠近所屬。村城  
甚多。其最著者得二十有七。康熙二十一年。其  
地回酋阿布都里什特。爲準噶爾所執。至三十

五年。準噶爾爲大兵所破。阿布都里什特偕妻子來朝。

賜冠服銀幣。遣官護送至哈密。俾歸國。後爲準噶爾所

阻。不獲內附。乾隆二十三年八月。霍集斯伯克以烏什降。告於將軍兆惠曰。霍集斯自庫車遁而西。非往喀什噶爾。卽葉爾羌矣。若大兵進攻喀什噶爾。則布魯特安集延。賊之仇也。必不往。將南奔葉爾羌。東南聯和闐以爲援。西南通拔達克山。痕都斯坦。哈喇圖伯特以爲窟。進退有

所據勢難拔。不若徑趨葉爾羌。招徠和闐。要截拔達克山諸路。一舉而克。擒賊必矣。喀什噶爾不足定也。兆惠從其計。率師進。霍集占聞之。卽擁馬兵四千。步兵六千。保葉爾羌。其兄波羅泥都。亦自喀什噶爾。以馬兵三千。步兵二千往會。賊乘我師未至。盡驅城外村莊居民入城。田禾盡刈。不及刈者皆焚之。近城多爲大坎。城東北兼築高臺。以資守禦。十月我師將抵葉爾羌。兆惠等勒兵二千。分中軍左右翼。兆惠率侍衛鄂實。

福齡安及閒散侍衛等爲中軍。叅贊明瑞等率  
巴圖魯兵二百爲中軍前隊。總兵高天喜領鎗  
礮隨中軍。燾爲後隊。左翼副都統鄂木布等領  
前隊。副都統愛隆阿等領後隊。右翼副都統由  
屯等領前隊。總管端濟布等領後隊。巴圖魯喀  
拉璘綽爾圖。厄魯特散秩大臣達什策凌率挑  
誘兵最先進。各部回兵在中軍兩翼間行。部勒  
既定。初六日。陳於城東。前限於坎。馬不能進。於  
是左翼兵自東向西進攻。右翼兵覓路向東進。

挑誘兵直前衝突。時臺上坎下空房破屋中。伏賊放鎗拒戰。我師奪臺殺賊。賊敗走。我師尾之。注矢如雨。賊紛紛墜馬。有頃城東西兩門內。各四五百騎出。陣而立。逡巡不敢前。俄出數十騎來致師。鄂木布。明瑞等十人。率勁旅賈勇入。摧鋒陷陣。城內益出賊兵。與我兵三戰。賊皆辟易。北門又出賊騎三四百來夾攻。爲由屯截殺。不得逞。自卯迄申。賊乃敗。入城閉門守。是役也。我軍甫集。殲賊甚衆。將士用命。凡新附之厄魯特。

回部伯克等。多怨霍集占之煽党背德。咸感激奮勇。軍聲大振。我師得偵者言。賊牲畜及沙拉斯家屬。俱在城南之英額齊盤山。議移兵往掠分賊勢。十三日兆惠先遣愛隆阿等。分兵八百扼喀什噶爾來援要路。乃徙營從城東轉攻城南。師濟哈喇烏蘇。甫四百騎。橋斷。賊兵乘機發。馬步繼進。兆惠率明瑞等。分列三隊。縱橫衝突。所當者破。殺賊千人。再敗之。已復分左右翼來。殊死戰。我軍自庫車遠至。馬力弗能支。更阻於

淖引軍渡哈喇烏蘇。達城東大營。賊眾四集。合

圍我軍。接戰五晝夜。士氣奮勵。軍中贏糧。足資

三月守。於是掘壕築壘以待援師。互詳卷二十八哈喇烏蘇

條。二十四年正月。會富德等統新調兵自阿克

蘇來援。阿里袞適解馬千匹馳至。遂振旅以還

阿克蘇。詳後呼拉瑪條波羅泥都。霍集占。度大兵再至。

必成擒。乃虜其民人牲畜。棄城踰山遁。於是葉

爾羌之舊伯克回民等。以全城降。先是。都統伯

納木扎爾。副都統三泰。奉



命往代兆惠。富德爲將軍。叅贊。至葉爾羌。兆惠等方在圍。愛隆阿據河駐後。納木扎爾。三秦過其營。猝陷賊。俱遇害。

勅於葉爾羌南建雙義祠祀之。

御製平定回部勒銘葉爾羌碑文

粵稽回始肇自天方。又名默克。一曰天堂。大食見元回鶻。見唐。是皆仿髯所傳。弗詳。惟我皇清撫有華夏。血氣之倫。均歸陶冶。準夷昔強。冥頑弗下。恃厥險遠。實梗化者。獫狁其衆。豺狼其羣。以回爲羊。役以耕耘。